

昌黎縣誌
(民國)
三

ISBN 988-978-316-9



9 7 8 9 8 8 9 7 8 3 1 6 7

二〇〇六年三月

中國海疆舊方志

選題組織策劃：蝠池書院出版有限公司

發行者：蝠池書院出版有限公司

出版者：蝠池書院出版有限公司

香港九龍旺角花園街二十六號好景商業中心二十三樓二三〇九室

電話：〇〇八五二一六五五九二三七〇

傳真：〇〇八五二一三八八七九〇〇

定價：人民幣 九五〇〇〇元（全書共三百一冊）

人物志下

忠烈

明

白毅邑人歷功陞錦衣衛都指揮同知以事註誤調雷州衛指揮
孫賊入境毅領軍殺賊屢立戰功後於竹叢尾村孤軍禦賊斬
獲甚多衆幾潰轉戰遇害贈本衛指揮使

雷州府志

邱養性字蔚蒼歲貢生知縣存性弟事繼母最孝以貢謁選授清
苑縣訓導以通經致用策勵諸生士風丕振有胡安定之遺風
升永清縣教諭崇禎十五年十一月兵薄永清與縣令高維岱
典史李時正鄉宦劉維蕙登陴拒守城陷脅以降不屈與高維
岱等同日殉難

採墓表及
通鑑輯覽

曾可毅歲貢生深澤縣訓導崇禎十五年清兵攻城城破死節

拽梯郎君失其名姓崇禎庚午清兵攻城昌黎知縣左應選邑紳
龍呈圖張文運等督衆守城七晝夜時清兵以梯上城將及堞
郎君自下拽之顛被殺城獲全同時死節者周昌會李崇樂張
三張守霜劉極楊狗子鄭應秋邱小月洪保兒馬九居孟之奎
張福兒孫鳴海于守道趙世祥高聲駿卜云吉郭來貴張友貴
鍾五兒翟三龔自學李蕃枝單應五朱可昌梁民樂于守通梁
世文王六兒劉君福孫三孫來各王國臣李思謙張六指郭得
各于大才王六周德純齊福共祀於忠義祠經楊巡撫嗣昌疏
建祠祀崇云爲激厲事本院經過昌黎見其一城斗大前被重
圍鄉紳士民抗節堅守卒挫併攻之銳竟成不拔之功憑軾低
徊肅然起敬聞其時守堞鄉兵有力戰而死者骨雖朽矣生氣
不磨可令泯泯無聞不爲來者勸乎爲此牌仰該縣刊石豎碑

有司春秋蜡祭爲之位而祝以辭俾萬世而下知其爲國殤也

俎豆無替或亦足以風矣今祀於忠義祠

同治四年
縣志

清

李雲起順治丙辰進士知山西黎城縣事姜瓖之變大兵南下賊

潰而土寇趙連方胡尙文作亂雲起死焉世襲雲騎尉

山西通志

劉天錫乾隆丁未武進士即用河南河北鎮懷慶府中軍守備以

軍功陞授行營都司從征湖北當陽之雙溝力戰陣亡子孫世

襲

張敬一登第元孫乾隆甲辰武進士三等侍衛原任慶遠協標中

營都司楚騷爲逆竭力攻勦於界石岡調陞廣西提標前營遊

擊奮力勦賊歿於鳳凰坡子孫世襲

魏亨達字伯鴻元煜子嘉慶己卯舉人江寧府知府加道銜賞戴

花翎髮逆犯境城陷以身殉咸豐四年賜卹太僕寺卿世襲雲

騎尉罔替

齊廣立道光丁酉科武舉直隸通永鎮左營千總咸豐三年河南

懷慶府禦寇捐軀世襲雲騎尉

劉玉昇道光丙午武舉授北塘營把總咸豐十年在女兒寺禦寇

陣亡世襲雲騎尉祀忠義祠

朱啓順以軍功授古北口提標中營千總後禦寇瓜州陣亡

以上俱同

治四年
縣志

李慶河南永城營參將光緒二十一年中東之役戰於平壤同左

寶貴陣亡子孫世襲

採訪稿

陳永春字太和韓超爲貴州巡撫跋涉萬里投效後薦於豫撫李
鶴年授千總同治六年以功充馬隊營官七年以守備用屢立

戰功自正月追賊至三月打仗無算四月至山東高唐州雙廟

力戰陣亡年三十四加遊擊銜世襲雲騎尉

畿輔通志

張凱柳河人天津武備學堂畢業才氣縱橫志向遠大民國初年

充曹次帥軍營哨官在湖北與南軍交戰陣亡年三十二歲

萬慶

元探訪稿

張作楫字濟川高小畢業年三十七歲充國民軍四十八師徒步

營第三連連長民國二十年在湖北棗陽縣討伐共產黨陣亡

同前

丁玉峯性勇敢二十二年擊匪於寶莊子陣亡

公益

王魁定字鴻遠慷慨尙義雅好斯文嘗語人曰不爲子孫置莊田
專爲子孫置書田傳爲美談值歲飢請縣賑濟不足日取積粟

補助光緒十六年夏大水沖塌民宅甚夥貧民露宿時魁積有
秫秸數十垛盡散於人令其作牆以泥塗之闔莊無不感激次
年春種有乏籽種者無不給之子國靈太學生孫澍雨附生澍
培中學畢業

閻仲麟字心矩庠生性情倜儻好爲人代鳴不平劣紳蠹役爲之
斂迹附近鄉村無冤民設教以道義爲根教家以耕讀爲本著
有詩經義解易簣時囑焚之止留其半子開鼎孫廣墉俱庠生
來孫佩之獎勵廩生現充建設局長

節錄採
訪稿

張文質字彬庵原籍灤縣長凝鎮人清初該鎮地畝盡入旂圈王
府派人收租地戶謁見迫令屈膝稱爺質不肯乃遷居靖安西
莊以商業起家每村中有貧苦者賑濟不遺餘力年八十一卒
謝廉字清軒翰林院待詔當清末見國勢阽危常提倡尙武精神

命長子維傳投效軍門左寶貴營爲哨官殉節平壤次子維藩
候選府經歷入民國充分局局長尤熱心公益村中每夏受水
患臨歿囑維藩繼成其志年七十一卒藩遵遺命建雙龍橋孫
方樸大學畢業方械肄業大學

任輔之字仲卿庠生與高路雲友善因清政不綱有隱居之志曾
向高君云清祚將衰吾輩宜敝屣科名以待時適有蠹役假官
斂財民怨沸騰輔之乃自負贓錢送達公庭縣令駭然置役於
法

張炳麟字懿臣起亭子增生庚子拳亂洋兵入境辦理支應時知
縣富賚棄城遁共推典史婁炳瑩維持現狀富事定潛回仍管
縣篆思陷害之時柳州將軍崇善與其叔雨亭至交因報捐知
縣持書投謁崇留幕府歷委閩海關等口稅務要差保升直隸

州知州嗣因母年高遂回籍佐理葉縣尊辦警務以及宣講所公議局樹藝局勸學所戒烟會等公務又創辦張氏族立兩等學堂尋被選爲諮議局議員及民國兩次省議員民國六年重修縣志被推爲監修年六十一卒子斌祖民國大學肄業

鄭翰卿字子英監生鄭國瑞字憲章同族兄弟也性皆慷慨庚子之亂洋兵入境劣紳某勾胥隸假洋差名目苛派雜捐該莫各堡地瘠民貧二公乃聯名赴縣請減未準上控又駁回在縣被押年餘贖金得釋復赴京攔某親王與準飭通永道雜差取消正差減三成劣紳蠹役依次責懲然二公幾於破家矣翰卿尤熱心新政學校警局皆首先創辦經宋令委任警董民十三年卒子殿臚銀行畢業國瑞值光緒二十年歲凶捐粟賑飢全活甚衆民國六年卒

王桂榮字恩卿少貧出外經商時上海有美商嘉王之誠樸畀以股份遂由此致富既富而好義惠孚桑梓租出之田數百畝租價較他人減半晚年常居上海與中外人接洽多行慈善事如萬國婦孺救濟會東洋地震救災諸善舉捐助不吝民初年卒子東山法政畢業東江高中肄業

李夢鈞字銘山舉人夢花弟貢生熱心公益當有清末葉舉辦新政首先提倡創設本村國民學校任義務學董成績卓著又開辦石門宣講所民智爲之開通充警董多年扞衛鄉里經縣長丁獎給保衛治安匾額惜年未六旬賁志以歿人多惜之子維翰法政畢業

劉柱字瑞亭性剛直凡除道成梁開辦森林創立學校諸善舉靡不盡力而爲庚子拳匪亂村中鄉愚若狂演習拳法柱獨大

聲急呼勒令解散是年秋洋兵入境居民逃散柱獨不避危險挺身支應鄉衆得保安全公衆勒碑記之

耿文昭字蔚然武庠生如雨子有任俠風當其興京貿易家僅小康村中立學堂捐助正洋千元他如修廟宇建橋梁舍樂施材公益之舉靡不首先提倡與兄文英文彥雖析居而供應貲財無分畛域年六十三卒

王樹屏字蔭侯候選同知幼時才具明敏人皆以大器期之嗣以失怙廢學事孀母以孝待胞弟以慈子錫三法政畢業鼎三大學畢業家教肅然輕財重義每逢賑災救急諸善舉踴躍樂輸郝縣長題其門曰急公愛國年五十三卒

閻項字震軒家僅小康熱心學務將自己宅舍作爲學堂迄今二十餘年成就後學甚夥母年八旬失明動作皆親自扶持命弟

秀鍾讀書爲增貢生五世同堂一門和順病革時囑子永升出
貲建村北橋梁年五十八卒

楊永祥字輝光幼貧失學及長勤學好問善貨殖諳數學凡公益
無不踴躍捐助創辦學校命姪占春盡義務事母至孝家人六
十餘口七世同堂子占三中學畢業

以上十七年稿

袁士達字贊廷光緒丁酉武魁性慷慨光緒二十七年夏德國及
英屬之印度兵過靖安占住商民各戶恫嚇多端達出首支應
不避危難故該街未遭蹂躪及民國十七年直魯交戰靖安堡
罹於戰線彼時達已臥病不能動轉人皆歎袁公若不殘廢不
至橫遭慘劫也年六十餘卒

王守寧字懷德家道小康輕財好義凡親友貧乏者罔不量爲周
濟一切善事恆捐助之光緒二十一年春大飢嘗捨粥以噉飢

民一鄉稱善士焉性喜讀書嘗語人曰勤儉乃治家之本詩書乃起家之本昔賢明訓自當奉爲金箴乃命子廷佐讀書入泮後赴日本師範學校畢業歷充縣教育科長勸學所長孫德浩第三師範畢業德濟肄業高等學校

王佐廷北洋法政畢業山西夏縣承審員曾呈請開墾其村西北荒坵熟地一百餘畝作爲小學的款惜因勞致疾三十七歲卒康作霖字澤溥蔚之曾孫累代書香至霖援例入太學以母老淡于進取孝行可風性慷慨設帳于家凡兒童貧乏者不取脩金鄉閒有競爭者必婉言勸解又精於鍼灸之法活人無算光緒二十一年歲大饑捐東蚨數千吊賑卹貧民賴以生活者甚夥民衆以一鄉善士表其門子四人次子良師範畢業教授鄉里三子恭著名商界綽有祖風霖年六十一卒

耆壽

清

孫蘭毓庠生年九十七猶手不釋卷詩書以外家無長物

楊大觀歲貢生性純篤事親孝教子弟先品行而後文藝諄諄訓誨終身無倦卒年八十三著有集英堂文稿孫際春舉人

趙柏齡字森亭庠生以好義重鄉里道光甲午恩賜副榜邑侯曾公每下鄉講聖諭必具束延之公服側坐以爲士民觀摩年八十四卒

侯官存年九十一歲

李祚祜存年九十一歲

唱化性存年九十四歲

齊維屏存年九十歲

齊殿銘存年九十二歲

謝鴻達武庠生任俠好義生平不娶鄉中事無大小經公一言立解里黨爲非者懾公多改行素破除迷信獨崇拜關帝晚年變產建關帝廟工竣跪祝曰願以所愛刀供奉神靈如蒙賞納當使我百步外三箭射中廟脊鐵燕旣爾三發果中遂以刀塑周將軍手至今猶存年九十三卒

孫魁五字希伊武庠生千總職秉性和平立品端正有子二人孫二人曾孫十二人玄孫二人親友送五世其昌匾額存年九十歲

孫興存年九十二歲

宋昇存年九十歲

宋奇珠存年九十二歲